


AKTA UNIVERSITI DAN KOLEJ UNIVERSITI 1971

PERLEMBAGAAN UNIVERSITI PUTRA MALAYSIA

KAEDAH-KAEDAH UNIVERSITI PUTRA MALAYSIA

(PROGRAM PENGAJIAN TANPA IJAZAH)

2014



Isi Kandungan

MUKA SURAT

BAHAGIAN A - PERMULAAN

- | | |
|--|---|
| 1. Tajuk Ringkas, Pemakaian dan Permulaan Kuat Kuasa | 1 |
| 2. Tafsiran | 1 |

BAHAGIAN B - KELAYAKAN CALON MENGIKUTI PROGRAM PENGAJIAN TANPA IJAZAH

BAHAGIAN C - PENDAFTARAN

- | | |
|---|---|
| 3. Keperluan Pendaftaran | 3 |
| 4. Pendaftaran Kursus | 4 |
| 5. Kesan Tidak Mendaftar dan Mengikuti Kursus Pengajian | 4 |

BAHAGIAN D - SISTEM PENGAJIAN

- | | |
|-------------------------|---|
| 6. Keperluan Jam Kredit | 5 |
|-------------------------|---|

BAB E – KEHADIRAN KE AKTIVITI AKADEMIK

- | | |
|---|---|
| 7 Kehadiran ke Akademik Aktiviti | 5 |
| 8 Keperluan Kehadiran Aktiviti Akademik | 5 |
| 9 Kesan Tidak Memenuhi Keperluan Kehadiran Kursus | 5 |
| 10. Kebenaran Menduduki Peperiksaan | 5 |

BAHAGIAN F – PEPERIKSAAN

- | | |
|--|---|
| 11. Kelayakan Menduduki Peperiksaan | 6 |
| 12. Markah Sifar bagi Pelajar yang Tidak Menduduki Peperiksaan | 6 |
| 13. Peperiksaan Ganti | 6 |
| 14. Arahan Am Peperiksaan | 7 |
| 15. Plagiat | 7 |

BAHAGIAN G – PENILAIAN, PEMARKAHAN DAN PENGREDAN

- | | |
|---|---|
| 16. Penilaian, Pemarkahan dan Pengredan | 7 |
|---|---|

BAHAGIAN J - AM

- | | |
|---|---|
| 17. Pembayaran Fi | 7 |
| 18. Pemakaian Kaedah-Kaedah Akademik Universiti | 8 |
| 19. Pemakaian Kaedah-Kaedah Tatatertib Pelajar Universiti | 8 |

AKTA UNIVERSITI DAN KOLEJ UNIVERSITI 1971
PERLEMBAGAAN UNIVERSITI PUTRA MALAYSIA
KAEDAH-KAEDAH UNIVERSITI PUTRA MALAYSIA
(PROGRAM PENGAJIAN TANPA IJAZAH) 2014

Suatu kaedah-kaedah untuk mengawal selia penjalanan program pengajian tanpa ijazah yang ditawarkan oleh Universiti Putra Malaysia dan perkara lain yang berkaitan dengannya.

Pada menjalankan kuasa yang diberikan oleh Seksyen 37(1) Perlembagaan Universiti Putra Malaysia, Lembaga membuat kaedah-kaedah yang berikut:-

BAHAGIAN A - PERMULAAN

Tajuk Ringkas, Pemakaian dan Permulaan Kuat Kuasa

1. (1) Kaedah-kaedah ini bolehlah dinamakan Kaedah-kaedah Universiti Putra Malaysia (Program Pengajian Tanpa Ijazah) 2014 dan hendaklah mula berkuat kuasa pada tarikh yang ditetapkan oleh Naib Canselor.

(2) Kaedah-kaedah ini hendaklah terpakai bagi program pengajian yang tidak membawa kepada apa-apa pengurniaan ijazah.

Tafsiran

2. (1) Dalam Kaedah-Kaedah ini, kecuali konteksnya menghendaki makna yang lain –

“aktiviti akademik” ertinya kuliah, amali, tutorial, tugas, atau segala bentuk pengajaran dan pembelajaran yang ditetapkan bagi kursus pengajian bagi sesuatu Program Pengajian;

“Dekan” ertinya ketua bagi sesuatu Fakulti atau Sekolah yang dilantik oleh Naib Canselor mengikut subseksyen 24(4) Perlembagaan;

“kehadiran” ertinya keterlibatan pelajar dalam aktiviti akademik yang memerlukan pelajar itu mengambil bahagian sama ada secara fizikal atau maya dalam sesuatu aktiviti akademik;

“kursus pengajian” ertinya kursus pengajian yang ditawarkan oleh Fakulti bagi setiap Program Pengajian;

“pelajar program pengajian tanpa ijazah”, ertinya seseorang yang berdaftar dengan Universiti dan sedang mengikuti program atau kursus pengajian tertentu tetapi tidak membawa kepada pengurniaan apa-apa diploma atau ijazah;

“peperiksaan” ertinya cara penilaian berterusan yang dilakukan bagi kursus pengajian yang didaftar oleh pelajar dan hendaklah merangkumi segala bentuk penilaian termasuk tetapi tidak terhad kepada ujian, tugas, kuiz, pembentangan, amali, projek, kerja lapangan, latihan praktik mengikut mana yang berkenaan dan hendaklah juga termasuk peperiksaan akhir;

“Program Pengajian Tanpa Ijazah” ertinya Program Pengajian yang tidak membawa kepada penganugerahan ijazah.

BAHAGIAN B - KELAYAKAN CALON MENGIKUTI PROGRAM PENGAJIAN TANPA IJAZAH

3. (1) Calon yang layak untuk mengikuti Program Pengajian Tanpa Ijazah ialah seperti berikut:

- (a) calon yang mengikuti program pengajian peringkat ijazah di Universiti atau institusi pengajian tinggi lain boleh mengambil kursus tertentu yang ditawarkan oleh Universiti;

- (b) calon yang ditawarkan kemasukan bersyarat kerana tidak memenuhi keperluan kemahiran Bahasa Inggeris yang ditetapkan oleh Universiti; atau
- (c) calon program pertukaran pelajar antara Universiti dengan institusi pengajian lain.

(2) Calon yang ditawarkan mengikut perenggan (1)(b), hanya boleh mendaftar sebagai pelajar Program Pengajian Tanpa Ijazah bagi tempoh yang tidak melebihi satu tahun. Semasa tempoh satu tahun tersebut, pelajar Program Pengajian Tanpa Ijazah hendaklah menduduki dan lulus peperiksaan TOEFL, IELTS, atau yang setara dengannya, dengan memperoleh tahap minimum kemahiran bahasa Inggeris yang ditetapkan oleh Universiti atau mengikuti program pengajian bahasa Inggeris lain yang ditawarkan oleh Universiti.

BAHAGIAN C - PENDAFTARAN

Keperluan Pendaftaran

4. (1) Setiap orang yang ditawarkan oleh Universiti untuk mengikuti Program Pengajian Tanpa Ijazah, dan menerima tawaran tersebut, hendaklah mendaftarkan diri dengan Universiti mengikut cara yang ditetapkan oleh tawaran tersebut, atau oleh Senat.

(2) Orang yang telah mendaftar dengan Universiti mengikut cara yang disebut dalam subkaedah (1), dikenali sebagai pelajar Program Pengajian Tanpa Ijazah, dan nama pelajar tersebut hendaklah disenaraikan dalam daftar pelajar Universiti sehinggalah pelajar tersebut berjaya menamatkan Program Pengajian Tanpa Ijazahnya, kecuali Senat mengarahkan sebaliknya.

(3) Pelajar Program Pengajian Tanpa Ijazah bukanlah pelajar berdaftar Universiti yang boleh dianugerahkan diploma, ijazah bachelar, sarjana atau kedoktoran.

(4) Pelajar Program Pengajian Tanpa Ijazah, tertakluk kepada apa-apa perjanjian antara Universiti dengan pihak ketiga yang lain atau apa-apa polisi kerajaan, layak diberi kemudahan yang disediakan oleh Universiti.

Pendaftaran Kursus

5. Pelajar Program Pengajian Tanpa Ijazah hendaklah, tertakluk kepada terma-terma dalam perjanjian antara Universiti dengan institusi pengajian tinggi lain, hendaklah mendaftar dan mengikuti kursus pengajian yang ditetapkan semasa berada di Universiti.

Kesan Tidak Mendaftar dan Mengikuti Kursus Pengajian

6. Pelajar Program Pengajian Tanpa Ijazah yang tidak mendaftar dan mengikuti kursus pengajian yang ditetapkan, tertakluk kepada terma-terma perjanjian antara Universiti dengan institusi pengajian tinggi lain, hendaklah dianggap gagal dan diberi gred tidak memuaskan dalam kursus pengajian tersebut.

BAHAGIAN D - SISTEM PENGAJIAN

7. Tertakluk kepada tempoh program pengajian tanpa ijazah yang diikuti oleh seseorang pelajar, Pelajar Program Pengajian Tanpa Ijazah hendaklah mengikuti sistem pengajian di Universiti berdasarkan kepada sistem semester atau trimester sepertimana yang diluluskan oleh Senat dan hendaklah mematuhi kalendar akademik Universiti.

Keperluan Jam Kredit

8. Pelajar Program Pengajian Tanpa Ijazah hendaklah mematuhi keperluan jam kredit mengikut terma-terma perjanjian yang dimasuki antara Universiti dengan institusi pengajian tinggi lain.

BAB E – KEHADIRAN KE AKTIVITI AKADEMIK

Kehadiran ke Akademik Aktiviti

9. Pelajar Program Pengajian Tanpa Ijazah yang telah mendaftar sesuatu kursus pengajian hendaklah hadir ke aktiviti akademik bagi kursus pengajian itu.

Keperluan Kehadiran Aktiviti Akademik

10. Pelajar Program Pengajian Tanpa Ijazah hendaklah menghadiri tidak kurang daripada 80 peratus daripada jumlah jam aktiviti akademik bagi kursus pengajian yang didaftarkannya kecuali ditetapkan selainnya oleh Universiti.

Kesan Tidak Memenuhi Keperluan Kehadiran Kursus

11. Pelajar Program Pengajian Tanpa Ijazah yang tidak memenuhi 80 peratus kehadiran bagi aktiviti akademik kursus pengajian itu, tanpa alasan yang munasabah, hendaklah tidak dibenarkan menduduki peperiksaan akhir bagi kursus pengajian Program Pengajian Tanpa Ijazah berkenaan, dan hendaklah diberikan markah sifar bagi kursus itu.

Kebenaran Menduduki Peperiksaan

12. Universiti boleh dengan persetujuan Dekan Fakulti, sekiranya dia berpuas hati, berdasarkan kepada laporan kesihatan yang dikeluarkan oleh pegawai perubatan

Kerajaan atau Pusat Kesihatan Universiti, bahawa ketidakhadiran pelajar Program Pengajian Tanpa Ijazah yang kurang daripada 80 peratus itu adalah disebabkan oleh masalah kesihatan, atau sekiranya bukan atas sebab kesihatan, pelajar itu mempunyai alasan lain yang munasabah, membenarkan pelajar itu menduduki peperiksaan akhir.

BAHAGIAN F – PEPERIKSAAN

Kelayakan Menduduki Peperiksaan

13. Pelajar Program Pengajian Tanpa Ijazah yang telah mendaftar kursus pengajiannya hendaklah dinilai oleh Universiti melalui peperiksaan bagi kursus pengajian itu, pada tarikh, masa dan tempat yang telah ditetapkan oleh Senat, Fakulti atau guru kursus pengajian mengikut mana yang berkenaan.

Markah Sifar bagi Pelajar yang Tidak Menduduki Peperiksaan

14. Pelajar Program Pengajian Tanpa Ijazah yang tidak menduduki peperiksaan sesuatu kursus pengajian yang telah didaftarkan hendaklah mendapat markah sifar bagi kursus pengajian itu.

Peperiksaan Ganti

15. Atas budi bicara mutlak Universiti, Universiti boleh mengadakan peperiksaan ganti bagi pelajar Program Pengajian Tanpa Ijazah yang tidak menduduki peperiksaan pada tarikh, tempat dan masa yang ditetapkan. Apa-apa peperiksaan gantian, sekiranya diadakan, hendaklah dibuat dalam tempoh dua minggu daripada tarikh peperiksaan asal.

Arahan Am Peperiksaan

16. Pelajar Program Pengajian Tanpa Ijazah hendaklah mematuhi arahan am peperiksaan yang ditetapkan dalam Kaedah-Kaedah berkaitan dengan akademik bagi pelajar prasiswazah.

Plagiat

17. Semasa pelajar Program Pengajian Tanpa Ijazah mengikuti kursus pengajiannya, pelajar Program Pengajian Tanpa Ijazah dilarang daripada melakukan plagiat, pemalsuan dan penipuan data.

BAHAGIAN G – PENILAIAN, PEMARKAHAN DAN PENGREDAN

Penilaian, Pemarkahan dan Pengredan

18. Tertakluk kepada terma dalam perjanjian antara Universiti dengan institusi pengajian tinggi yang lain, pelajar Program Pengajian Tanpa Ijazah yang telah menduduki peperiksaan hendaklah dinilai, diberi markah dan gred mengikut panduan dalam kaedah-kaedah akademik prasiswazah atau siswazah, mengikut mana yang berkenaan.

BAHAGIAN J - AM

Pembayaran Fi

19. Dalam ketiadaan terma berkaitan fi pengajian dalam perjanjian antara Universiti dengan institusi pengajian tinggi lain, pelajar Program Pengajian Tanpa Ijazah dikehendaki untuk membayar fi program atau kursus pengajian Program Pengajian Tanpa Ijazah yang ditetapkan oleh Universiti, dan apa-apa fi lain yang berkaitan dengan apa-apa kemudahan yang diberikan oleh Universiti termasuk fi

berkaitan dengan pengurusan hal ehwal akademik pelajar itu, penginapan, perubatan, dan seumpamanya.

Pemakaian Kaedah-Kaedah Akademik Universiti

20. Kaedah-Kaedah yang berkaitan dengan akademik bagi pelajar prasiswazah dan siswazah mengikut peringkat pengajian masing-masing hendaklah terpakai *mutatis mutandis* kepada pelajar Program Pengajian Tanpa Ijazah.

Pemakaian Kaedah-Kaedah Tatatertib Pelajar Universiti

21. Kaedah-Kaedah tatatertib pelajar yang berkuat kuasa di Universiti hendaklah terpakai kepada pelajar Program Pengajian Tanpa Ijazah.

Dibuat 2014
[Minit Mesyuarat LPU]
[UPM/PPUU/100/....., UPM/ACAD/.....]

PROF. EMERITUS TAN SRI DATO' DR. SYED JALALUDDIN SYED SALIM

*Pengerusi Lembaga Pengarah
Universiti Putra Malaysia*

AKTA UNIVERSITI DAN KOLEJ UNIVERSITI 1971

**PERLEMBAGAAN
UNIVERSITI PUTRA MALAYSIA**

**KAEDAH-KAEDAH
UNIVERSITI PUTRA MALAYSIA
(PROGRAM PENGAJIAN TANPA IJAZAH)
2014**

